

本朝分省人物考

人物考卷之三十六目錄

南直隸徽州府

一

汪  
叡

朱  
升

詹  
同

汪克寬

趙  
汎

汪致道

詹  
徽

胡壽安

高  
斗  
南

鄭居貞

程  
平

程  
通

莊  
觀

方  
勉

程  
富

鄭汝敬

吳寧

楊寧

程思溫

汪回顯

程泰

饒欽

汪進

汪溥

潘珏

汪舜民

胡富

洪遠

程敏政

汪奎

方璫

謝復

謝顯

吳爵

胡德

戴祥

葉 璇

趙時勉

黃 鏗

游震得

鄭 煭

王獻蓋

許象先

程弘忠

本朝京省人物考卷之三十六

南直隸徽州府

一

汪 叢

汪叢字仲魯號一貞婺源人洪武初駙馬王公克恭由新安移鎮會稽從調入閩叢長子澤先從事王公幕下素知學行廼專使禮延至三山闢館於鍾山之陽載越歲以疾辭歸洪武甲子孟秋朝廷復下徵賢之詔有司敦迫上道至則司禮官引見上舉書之西伯戡黎篇命釋之叢詳析發明深愜聖意時受顧問俾翊贊儲皇授承務郎左春坊司直上

亦日召侍講周旋於兩宮之間與朱善劉三吾二學士趨朝則同班賜坐則聯席入稱三老開陳善道從容獻納天顏每爲霽威上嘗憫其年老氣喘勅賜朝房俾便於趨朝萬幾之暇命續製薰風南來詩諸作皆稱旨諸近侍臣僚亦皆推遜遇春夏萬物發生之際人有罪至死者輒涕泣俯伏進諫請決以時無傷天地生物之仁上允所奏常稱爲善人明年頒誥寵諭再踰年丙寅仲春喘疾大作力疾奏請歸家療病期秋載至可其請三月朏上御奉天門勅中使傳宣召之至賜坐語次顧曰若知所以召

見意乎叢起對曰未知曰日昨嘗以老病故請遞選  
婺源期秋載來朕可其請有不須辭別之旨已乃思  
之光陰有限言歸有期喘噦爲病誠劇然恒見此病  
者往往壽考矧若龐眉有壽之徵若之心事朕深知  
之孔子不云鄉人之善者好之其不善者惡之乎若  
多讀書何理不窮第心素善於人之善者固好之不  
善者亦不惡之耳朕今許若還鄉母庸弄來矣所戒  
者近侍之歸郡若邑官來見當閉門以絕否則筆之  
於東俾僮僕輩示之若曰仲魯幸蒙 聖恩予告還  
鄉理宜杜門謝客輸租應役則有恒制矣其敢以是

自速厥戾如是則可考終命矣歟叩首謝曰

聖上

愛人以德適茲 聖訓是欲臣全其晚節者敢不欽

佩以矢母負 上心明日辭 朝都門送車百兩觀

者填道莫不嗟咨詠歎以爲千載一遇也生平爲人

和而純其用莊而毅內之孝外之仁默而智言而信

窮而不憂樂而不滛所爲文章博厚淡雅賦頌詩歌

其要咸歸於正積有十帙名曰涪溪集又十有六年

考終於正寢年七十有九

朱升

朱升字允升休寧縣人幼師鄉進士陳櫟深器之元

至正癸未聞黃楚望講道溢浦偕趙汸往學焉旣有  
得乃歸讀書紫陽祠中乙酉舉鄉薦授池州路學正  
壬辰淮甸嘶黃兵起升所居窮僻雖避兵逋竄著述  
不輒脫去俗學直造本真究極玄微覃精大道丁酉  
高皇帝遣元帥胡大海等至徽州路改徽爲興安府  
升以鄧愈薦被徵入見顧問稱旨 上問之對曰高  
築牆廣積糧緩稱王 上嘉其朴遂叅密議凡禮樂  
征伐典章文物多所贊畫吳元年丁未拜侍講學士  
知制誥同修國史 上親製誥詞有曰眷我同宗之  
老實爲耆哲之英無何陞爲本院學士特免朝謁以

優禮之洪武元年 上御東閣顧謂升曰近觀周禮有所謂六夢者朕嘗感異夢厥兆維何升對曰人之精魄上通於天此 陛下受命之兆也軒轅夢遊華胥天下大治帝王之興自有天命蓋振古如茲矣三月辛未命儒臣修文誠又諭升曰治天下者修身爲本正家爲先始於謹夫婦后妃雖母儀天下不可使預政事至嬪嬪之屬不過備機事侍巾櫛若寵之大過恐驕恣犯分上下失序歷代宮闈政由內出未有不爲禍本者卿等爲朕述文誠及古賢妃之事可爲法者示後世子孫有所持守升受命纂輯二年三月

戊戌復命撰齋戒文是月請老歸石門乃居梅花初  
月樓上親灑宸翰以賜卒年七十二學者稱爲楓  
林先生所著有易書詩周禮儀禮禮記孝經四書小  
學旁註及書傳補輯諸書傳解行於世子同爲禮部  
侍郎

詹 同

詹同字同文舊名書婺源縣人生而穎靈獨抱奇氣  
元學士虞集以其弟槃之子妻之至正中舉茂才異  
等授郴州學正遇亂道梗因家黃州陳友諒徵爲學  
士承旨兼御史高皇帝平陳首召爲國子博士易

其名曰同尋陞考功郎中未幾以爲侍制起居注丙午年四月命有司求遺書 上謂同曰三皇五帝之書不盡傳於世故後世鮮知其行事漢武帝購求遺書六經始出唐虞三代之治始可得見大有功於後世吾每於宮中無事輒取孔子之言觀之如節用而愛人使民以時真治國之良規誠萬世之師也遂命攷宗廟時享禮吳元年四月 上諭同曰國史貴乎直筆是非善惡皆當書之昔唐太宗觀史雖失大體然命直書建成之事是欲以公示天下也予平日言行可紀其事是非善惡汝等皆當明白直書勿宜隱

諱使後世觀之不失其實也洪武元年四月命畫古  
孝行及起家戰伐歷世愁苦爲圖以垂世訓上謂  
同曰朕家本業農祖父皆長者世承忠厚積善餘慶  
以及於朕今圖茲以貽子孫俾知王業艱難也同對  
曰 陛下昭德垂訓莫此爲甚 上曰富貴易驕艱  
難易忽久遠易忘後世子孫生長深宮惟見富貴習  
於奢侈不知祖宗積累之艱故示之俾朝夕覽觀庶  
有所警也是年十二月以同爲直學士二年三月陞  
侍讀學士會中丞劉基疏請加禮大臣同因取戴記  
及賈誼疏以進且復開說剴切 上深納之又諭同

曰古人爲文章或以明道德或以通常世之務典謨之言明白易知無深怪險僻之語至如諸葛出師表亦何嘗雕琢爲文而誠意溢出使人讀之自然忠義感激近世文士不究道德之本不達當世之務立辭雖艱深而意實淺近卽使過於司馬相如楊雄何裨實用自今翰林爲文但爲通道理明世務者無事浮藻四年乃陟爲吏部尚書上諭曰吏部者衡鑑之司鑑明則物之妍媸無所遁衡平則物之輕重得其當蓋政事之得失在庶官任官之賢否在吏部任得其人則政理民安任非其人則瘞官曠職卿等居銓

衡之任宜任公平以別賢否六年七月以同爲學士  
承旨兼吏部尚書 上御奉天門謂同曰論行事於  
目前不若鑒之於往古卿儒者試言古先帝王爲治  
之道同對曰帝王之治莫善於唐虞三代可爲萬世  
法 上曰三代而上治本於心三代而下治由乎法  
本於心者道德仁義其用爲無窮由乎法者權謀術  
數其用有時而窮然爲治者違乎道德仁義必入於  
權謀術數甚矣擇術不可不慎也八月同與侍講學  
士樂韶鳳等上所製釋奠先師孔子樂章 上曰祭  
貴乎誠若省牲告克告腯及禮之煩文者並宜革之

九月同等上言自 上起兵渡江以來征討平定之  
蹟禮樂治道之詳雖有紀載而未成書乞編日曆藏  
之金匱傳於後世 上從其請命與侍講學士宋濂  
爲總裁官 九月詔科舉暫且停罷令有司察舉賢  
才必以德行爲本文藝次之仍令同選國子成材者  
與所舉參用授主事給事中御史等官時用彭通等  
爲給事中并國子生李擴等入文華武英二堂謂之  
小秀才七年五月丙寅 皇明寶訓垂成同以老乞  
歸 上賜勑褒荅允致仕未幾復起爲學士承旨六  
月 上謂同曰大祀旣終獻方行分獻禮於禮未當

卿等具議之於是同與學士宋濂議以 上行初獻  
禮奠玉帛將畢卽分獻官行禮初獻亞獻終獻皆如  
之 上從其議又謂古人祭用香燭皆所以道達陰  
陽以接神明初無上香之禮遂定凡祭祀罷上香復  
以老乞休卒於家所著有天衢吟嘯及海涓集子徽  
爲左都御史兼太子少保吏部尚書以事坐廢徽子  
祓爲太子洗馬改尚寶司丞

汪克寬

汪克寬字仲裕祁門人少穎慧從鄉先生學每屈其  
師日益月異至十歲父取東山問學于饒先生講授

之書及當時問答之言與之觀玩遂於理學有悟乃取四書自定句讀晝夜誦習恍然知爲學之要專勤異於儕輩或達旦不寐父呼而諭之曰讀書以養氣爲主不宜過勞曰某自樂此不爲勞也自是讀六經諸子歷代史通鑑綱目等書悉皆成誦延祐四年丁巳年十有四歲是秋鄉里傳錄江浙秋試三場題目揮筆成篇鄉先生驚異曰此天才也明年郡守延雲峰胡先生柄文於郡庠開堂試以激勵後進竟與庠序諸老咸相頌頌矣旣謁吳仲廷先生而歸遂篤志聖賢之學闢書齋于居室之東偏扁曰思復銘于齋

以自勵焉泰定丙寅邑長令聞其學行邁異舉鄉江浙鄉試卽中前列次年春至京會試論春秋與主司不合又兼對策切直遂見黜于中書欣然南歸刻勵爲學痛自修飭遂厭科舉之文慨然曰道不行於當時矣乃取聖人手筆之春秋傳考諸說之同異得失以胡文定公之傳爲主而研究衆說會萃成書名之曰春秋經傳附錄纂疏行於世易有程朱傳音義考詩有集傳音義會通禮有經禮補逸綱目有凡例考異其餘論著未可枚舉寬於經史聖賢之言心融神會造詣深劇故爲文略不經意而渾融典雅其教

學者誘掖獎勸無不成人後以經學教授宣歙間數與師山鄭公講理論學意氣相得四方學者從遊甚衆鰲峰玉署請老欲以文章舉薦而寬篤志著述不以一毫利祿動其心諸從學者以所居山谷園遶稱曰環谷皆曰環谷先生迨至正壬辰蘄黃兵至乃率長幼避兵深山所居房舍資財爲賊焚掠殆盡簾瓢屢空晏如也自是連歲兵戈擾攘至聖朝戡定始返故廬洪武二年朝廷命行人賚幣禮聘至京同翰林潛溪宋公刪修元史是年九月事畢特旨一班俱畱祿仕寬以老疾力辭不受乃命禮部設宴賜白金

三十兩采段二表裏給驛而還抵家以洪武五年壬子卒年六十有九

趙 汝

趙汝字子常休寧人受學于九江黃楚望復以書謁臨川虞集求草廬吳澄道學淵源嘗以爲周易春秋二經皆夫子手筆聖人精神心術所存必盡得不傳之妙然後孔門之教乃備其于春秋不舍史以論事不離傳以求經不純以褒貶泥聖人以爲左杜主史釋經而不知筆削本旨公穀知求筆削之旨而不考魯史舊章俱不能無弊乃離經析意分爲八類辯而

釋之名曰春秋屬詞以著聖人筆削之旨作春秋集傳十五卷以明聖人經世之志著左氏傳補註十卷師說三卷以爲學者求端用力之階又著葬書問答一卷至正末起鄉兵輔婺源汪同保鄉井洪武二年召修元史乃如京師事竣不願仕還未幾卒年五十二學者稱東山先生有東山集

江致道

汪致道字成德黟縣人元至正壬辰兵變所在剽掠乃損家貲以保鄉里繼募義兵從官軍復郡邑主帥李克魯上其功署黟縣簿歲丁酉天兵南下寧河王

時僉樞密院事總兵克定徽郡卽以所部義兵散駐  
田里而籍其名數于有司邑令賢其爲人具書幣禮  
請至仍牒委以縣簿率吏民往築郡城晝夜盡瘁民  
忘其勞歲癸卯郡守李納薦于朝授滁州全椒縣簿  
之官未踰年改監安慶湖池規畫有方錫報優異中  
書省以才幹委覈鎮江之丹徒丹陽金壇民兵單騎  
而往躬循村落召集隣戚參詢互考實稽無隱休役  
家居者諭令還戍逃亡戶絕者官贍其產鰥寡廢疾  
者削籍爲民旣復命洪武戊申陞知徐州蕭縣地當  
南北之衝累年兵燹人民散逃下車之初竭力招懷

禮下賢俊恤孤抑強旣踰時民襁負歸耕庶務咸理治爲諸縣最俄有黠吏以飛語中之部使者廉其治行懲吏奸欺置于法略不自辯唯求解印南歸旣歸田里日以詩酒自娛散步丘園遇田夫野老笑談忘倦自號高閒野叟友愛其弟至老不異待宗族鄉里恩義不爽接朋友久而能敬初倪先生葬未得地卽與其弟謀捐重貲購地于余思塢力爲遷葬接人待物忠信端慤終始不渝故人無貴賤皆聽信之鄉里稱之曰成德之排難解紛如魯仲連望廬息訟如王彥方其爲人所欽重如此

詹 徽

詹徽字資善婺源縣人吏部尚書同之子也徽有才智見事敏決洪武十三年以薦舉擢監察御史性嚴厲不以色假人善持風紀上嘉之十七年陞都察院爲正二品設左右都御史并左右副僉都御史及十三道御史專糾劾有司辨明冤枉提督各道一應不法事務特陞徽爲左都御史徽持憲多務嚴苛諸司凜凜不敢犯十八年吏部尚書趙瑞伏誅命徽兼吏部 上以徽在職公勤詔有司復其家又以北方學校無名師生徒廢學命徽於南方學官選有學行

者教之後涼國公藍玉以反謀下獄 上集羣臣廷  
鞫未服徵叱令何不具實玉反誣徵爲黨竟及于禍

胡壽安

胡壽安字克仁徽州人洪武庚辰科領鄉薦入成均  
學事天曹筮仕河南信陽令大著能聲尋調真定之  
獲鹿政益著未再朞丁內艱永樂甲子冬服闋復宰  
新繁視篆初首詢民瘼事有不便於民者罷之有益  
於民者舉行之每歲初自巡視鄉村勸民播耕遇畠  
畝荒蕪或垣屋摧壞者詢其窘乏之由必損俸資給  
常以古靈先生教民之言諭鄉耆里甲俾知親睦安

分之道率皆從化侯性清儉在官惟僕衣糲食如韋  
布士嘗臥一紙帳自題句云紫絲步障簇春華臥雪  
眠雲自一家雪又不寒雲又暖扶持青夢到梅花其  
雅淡之情槩可見矣永樂乙未夏數月不雨田疇龜  
裂齋沐禱於神二日果大雨後圃種蘆菔數畦使客  
往來者採之以供盤飣或爲餽遺之禮人呼爲菜知  
縣其子從新安來省兩月烹二雞怒讓曰飲食之人  
則人賤之矣吾居官二十餘年常以奢侈爲戒猶恐  
弗能全始終之志爾今好大嚼詎不爲吾累乎其子  
服訓亦甘淡泊三宰大邑未嘗攜妻子之任戊戌春

將考績囊橐罄然惟畜一馬欲售爲程途費馬忽病  
命醫獸治之數日弗愈其家人來報曰汝妻死矣待  
汝歸方殯陳聞哀慟良久曰妻已死我至家安得生  
我宰公平日粗衣糲食撫民如子未嘗取我民半錢  
吏不敢欺我里甲無敢擾我俾耕民安於耕鑿皆宰  
公之恩也今赴京而馬病若此我若離去馬必危矣  
宰公以何爲路費乎我寧負亡妻不可負宰公乃遺  
書諭其子曰喪具稱家有無日吉則窀穸母候我歸  
當祖道日邑民遮泣於道者千數雖婦人小子如悲  
親戚民以臚獻者皆却之

高斗南

高斗南字拱極徽州人體貌魁偉語聲若雷聽者歛容才識明敏慨然有遠志國初以州司薦授四川定遠知縣惠政多方百姓感頌至爲謠曰江上高樓鼓角鳴至今吹出斗南聲自從來作公平吏多少人傳去後名三載考績以他故下刑部獄定遠耆民劉興等相繼奏其廉能公正太祖知其賢而赦之復命知定遠且賜以錦衣綺絲表裏靴帽金銀筵宴時舉天下廉官數人斗南在其中列其事於聖政記九載最績陞雲南新興知州德政爲新興人所愛戴不異

定遠時居數年以衰老乞歸上疏薦子恂以自代  
上允之後遣以歸年七十而卒

鄭居貞

鄭居貞徽州人豐頰美髯從父濬官萬中師貢師泰  
洪武中舉明經授鞏昌通判陞禮部郎中文行爲時  
所重二十三年進河南參政永樂初坐方黨論死初  
孝孺之教授漢中也居貞嘗以詩送之曰翩翩紫鳳  
雛羽翩翩五采徘徊千仞翔餘音散江海於焉覽德  
輝濟濟鏘環珮天門何嵯峨羣仙久相待秦漢縣朝  
陽夜息飲沆瀣如何復西飛去去秦關外岐山諒匪

遙啄食良自愛終當巢阿閣庶以鳴昭代孝孺亦贈  
之文謂其叅政河南三年而去吏民以不能畱爲憾  
歡然兩相得也平居共以忠義各相砥勉死之日從  
容赴市無一言及私

程 平

程平字德正績溪人幼失怙恃稟性溫厚恭恕言貌  
恂恂與物無競鄉里稱之素與里人張德良友善洪  
武初德良坐事繩法株累百餘人平亦波及焉御史  
廉得其情喻之曰灑於衆則汝免矣平起謝曰家世  
業儒非義不敢爲平不幸爲人所誣而又誣人欺天

者也天可欺乎寧以身待罪御史深歎異之尋謫延安與郡人朱仲杰偕行仲杰悍戾不以道相遇盛暑同休憇道傍樹下仲杰曰德正守行李我前問店乃趨酒家久不至俄暴雨水漂其行囊平自收不暇仲杰還盛怒責償如數償之不與校逮至延安仍與同處仲杰以醫自託于梅百戶明年仲杰臥疾知不可療以其所有盡寄之梅曰必吾子至乃付之旣卒梅調守他郡仲杰死平備棺衾殮之或曰其人待子如是獨無憾於中邪平曰彼自虧其德耳且與同郡而生同患難而來死無所歸於我乎殯聞者莫不歎服

朱氏子德生以母命來省行至汴聞其父已死而鬻  
篋又爲梅百戶挈之他往中道還家給其母曰吾買  
地葬父于城東矣又出其所攜衣曰此父遺物也越  
三年庚申平子寔往延安省侍遂命負其遺骨歸績  
溪信報朱氏子令迎柩還葬德生怡然不復顧丙寅  
秋平自延安歸知朱氏柩尚留殯後園不悅曰延安  
數千里尚爲負之歸由績溪距休寧僅百里豈可棄  
乎且德生旣給其母必慚懼不來卽命孫通送至其  
家其接人待物存心忠厚如此子寔字以誠亦剛直  
尚義有族弟以忠由河南永寧令轉知潮陽程鄉縣

洪武乙丑以忠之子泰乙年稍弱偕寔與省父中途聞以忠因事繫獄泰乙求回寔變色責曰汝父官所坐事正當捐生赴救舍之而歸獨何心乎曰將如瘴癩何復叱曰但當力以赴援瘴癩非所恤也至潮陽月餘乃還過文江寔果冒瘴而殞年五十有一

程通

程通字彥亨績溪人少有至性動必遵禮嗜學不倦年十四補庠生洪武乙丑貢太學時年二十二丙寅父以誠死嶺南通徒步扶喪還葬廬墓下三年哀慟毀形妻子至不相識戊辰復上太學時祖平謫戍延

安已老通上書言臣壯而無父祖猶父也臣祖考  
無子孫猶子也更相爲命今邊徼戍卒如林豈少臣  
祖者詞極哀切 上憐之持其章不下陰命兵部驛  
召其祖旣至并召通立階下東西相向 上顧通曰  
汝識此人否於是祖孫相持而泣哽咽不能仰視  
上嗟歎良久下令兵部除其籍驛送平還鄉庚午秋  
通取應天解時遣諸王將兵行邊 上以封建策諸  
貢士於廷獨通所對稱旨親置第一除遼王府紀善  
辛未從王閱武臨清壬申從之國時遼西王府未建  
以祖喪免歸廬墓三年服闋復任已進長史悉心輔

導王敬禮之事必咨焉府中有衛士紀綱者狡猾善  
邏偵得幸于王通每召而笞戒之會靖難兵起潛遣  
人與王約通疏上封事數千言旣登極紀綱以入賀  
留侍歷官錦衣衛指揮使數被顧問因乘間言及封  
事遂有 詔械通至京死獄中家屬戍邊下續溪簿  
錄其家得猶田數十畝遺書數百卷牴皮數張而已  
通居常恂恂如有弗逮至臨事則毅然不可奪所著  
稿百餘卷悉毀于官績溪程姓最衆賴使者仁恕罪  
止一房餘獲免焉

莊 觀

莊觀字居正歙縣人年十四執父喪有禮弱冠游郡庠才識穎敏讀書過目成誦同輩皆推讓之永樂辛卯以春秋應鄉貢明年會試中乙榜分教浙之義烏素明理學善屬詞造就弟子有法歷三科得秀士八人皆爲世用滿考優等陞辰溪敎諭一以教義烏者敎其弟子文風翕然未幾丁內艱起復赴京擢國子學正弟子居座下者皆知明理屬詞出而從宦悉能推其所教以措諸用正統改元新制每省以憲臣董儒學各舉所知大司馬王公驥以觀薦擢陝右按察僉事董八郡秀士以督其成首立教條次嚴紀律務

期成德達才之効陝西彊里散濶山川險阻不憚勞  
苦歲一躬蒞必得其實以故八郡士子爭先奮勵以  
學成名立爲期每行部則曰學校以明倫爲先文章  
末事耳郡縣遵其化雖夷狄之俗皆尚廉恥德教所  
致也諸生有聰慧出衆進益學業者則喜形于色優  
養如至寶獎之以礪諸子俾各觀感以盡力其造就  
人才類如此九載秩滿例得陞秩大學士王公時以  
都憲出鎮關中特爲具奏陞擢本司副使仍董學校  
又三載是爲景泰改元奉表赴京遂上書乞骸骨歸

方 勉

方勉字懋德歙縣人永樂乙未進士選庶給士尋奏  
回畢姻陞辭命兵部給腳力又錫鈔爲婚禮費尋赴  
南京復任扈從北京尋丁外艱服闋除行在太常博  
士復丁內艱免喪正統二年授行在監察御史劾都  
御史李儀巡皇城四門審獲王振家人卽日上聞巡  
五軍教場覈奏鎮遠侯顧興祖并彈工部尚書吳中  
所舉非人出按江浙回朝力言浙江急務莫大於防  
倭而防海都指揮張翥年老且貪不堪備禦陞湖廣  
僉事時永樂宣慰使彭世雄與桑植安撫使向晟有  
隙誣奏世雄以篡竊事奉勅往治勉躬詣其境召其

屬南渭等州并各長官司官吏訊之以實上聞錄晟之罪陞湖廣右叅議以捧賀入京陳言二十事天順元年滿兩考復入京疏乞致仕不允回任復請乞骸骨歸詔進階朝議大夫致政歸里成化庚寅二月與客談論當時務因呼諸子曰我平生得力惟一忍小子識之是夜疾作黎明起盥櫛就床而瞑享年七八

程富

程富字好禮歙縣人永樂甲午中鄉試歸丁內外艱癸卯赴春官卒業成均宣宗臨御三年大黜御史

不職者選國學才識之優者任之初授陝西道監察  
御史提挈紀綱鋤削豪猾庚戌 命巡廣東其地阻  
隔山海使者往往憚之富至不避瘴癘躬歷蠻區鋪  
太和以惠鰥寡用重典以戢奸暴吏無乾沒之患民  
有奠安之樂一切官吏貪墨土豪爲民害者悉去之  
不畏權力聲威振動民到於今稱之甲寅秋以江西  
歲連祲民不得安命悉出倉穀以賑饑氓活者不知  
其數樂安永豐新淦三邑有劇盜曾子良以妖術動  
衆聚至數萬柵巖穴豎旗號爲永順王成國公都督  
等官焚劫殺人其勢猖獗有司不能制或言宜招諭

以安之富曰招諭云者宜施於寇盜窮蹙之日今彼  
因民饑蠱惑其心勢焰方熾安肯輸服稍緩燎原爲  
患不淺此宜急擊時都司缺軍檄長河都指揮吳堅  
領兵討之恐其弗敵調吉兵鳩民壯躬率抵賊境爲  
援兵未至出榜諭以朝廷威德從違利害之故以  
携離其黨賊恃衆蜂屯蟻聚求抗我師乃出奇敗之  
賊用蚩尤之術又召術士開之戒衆以待曰霧散必  
來須臾賊果至富鼓勇自將擊之無不一當百賊不  
能支敗北乘勢擣其巢穴獲男婦數千餘人旣而府  
兵旣至賊亦窮蹙盡俘其衆皆欲屠之富曰槩而誅

之豈仁義之師哉審放平民一千有奇一郡寧謐  
曰程牙冠破大盤逆賊死吾民安奏捷上降勅褒  
譽陞大理寺左少卿賜紵綵寶楮時江西苦造紙鑄  
錢二局爲奏罷之又奏免梔心杉樟等木二百四十  
餘萬以甦民困還署棘寺印平反庶獄民稱無冤正  
統三年進階中憲大夫薦邑士江彥傑休寧王永華  
以賢良進用明年乞假焚黃上憫其孝思賜寶鈔  
路費旣歸作壽藏於歙東之古城關五年還京時甘  
肅缺參贊召陞右僉都御史出鎮張掖裁決軍務糾  
察貪廉訪博識士以咨所疑定未來策以防急猝小

事立辦大事驛聞上而總戎將佐下而部曲卒伍莫不畏服富在邊凡軍民利病知無不言一曰陝西行都司梁州等衛城內多空地官豪占據軍士失住艱苦無訴乞取各城被占空地盡撥與軍俾得安生以養銳氣二曰沒官田土加添稅糧反貽鄉里之累自今藉沒產土乞依時價買米上倉民免負累官無逋程三曰禦敵殄寇全仗勇敢之士若非平日周養臨時何以責効甘肅梁州莊浪等十四衛官軍多有勇敢之士精選另編隊伍全支月糧加賞冬衣使異於衆遇有寇盜必收成効四曰蘭縣過河抵甘肅城堡

往年胡寇犯邊多被虜掠許其所以由于平昔不曾操練故寇至不能抵禦乞令空閑軍餘各給軍器每月操練遇有緊急可相救護五曰古人立賢無方有文學者或迂於政事有政事者或劣於文學若不廣求恐未得人乞凡遇科舉不拘名數但文可取者取之會試亦然授職之後嚴加黜陟則人才得矣其言皆切中時務六年辛酉還理院事雲南連年征討麓川邊儲不給無功七年壬戌命往區畫餉道崎嶇負戴者難之富謀於上下途董簿校羣聚樂趨糧芻克羨士無飢色民不告苦大功用集八年癸亥就軍中

陞左僉都御史甲子事竣還 賜以白金紵絲陞右副都御史明年上章乞歸於天順二年卒年七十

鄭汝敬

鄭汝敬字行居歙縣人生而秀異夙知向學里舉充縣庠弟子員攻書綴文日出人表尤善爲詞說明白委曲以達聖賢立言之旨部使者至有司輒引之進講無不愜服嘉獎然屢赴秋闈弗利入太學年甫二十九時胡公儼爲大司成一見奇之教之間學大進公退謂人曰頃得胡公講明所學僅三月爾雖讀書三年弗及也未幾連舉永樂乙未進士觀政秋曹適

吏部輪選天下候銓官先後倒施物論不平公曰進  
賢不能以公其如天下士何遂以疏聞詔從其議吏  
部滋不悅然朝廷由是知汝敬名命往督陝右糧  
儲性嚴毅所過有司督責無少貸多忌之者遂中以  
罪坐役北京平居與兄迪簡弟懋簡極友愛至是皆  
傾貲赴難先後死逆旅聞者悲之縉紳多爲詩歌以  
道其事者役滿除知順天府永清縣事永清爲畿內  
大邑號叢脞治之有方不煩勞而事以次理嘗有中  
貴人臨縣索賂甚急漠不爲動遂給入見縲繦之欲  
置之死士民遮畱解還卽以狀聞太宗皇帝怒欲

置中貴人罪會 仁廟嗣位赦免無何得代去朝廷  
適有大役工部復命監焉旣又謂工不宜久興勞民  
非便上言息其役調紹興府上虞縣先是爲令者適  
以貪冗去民素知其名皆踴躍歡迓載道敬亦樂民  
之向方也爲之抑豪右勸農桑賑飢窮治興梁棧道  
官無愆期之需獄無留滯之訟居二年邑大治監察  
御史尹崇高號嚴厲有司多望風引退獨嘉賞之嘗  
問紹守六邑令孰優守曰惟鄭令清介肯爲但其人  
氣太爾公曰人惟有氣斯能生聖賢能養是氣故克  
宇宙可無氣而爲人乎守不能答旣而考浙江七

十二縣令置爲第一凡別邑有疑訟不決者多檄徵  
理之敬亦悉心民隱不遺餘力然同僚猜忌日甚先  
是邑有耆儒曰柳南仲賢而有文敬雅重之閔其貧  
贈以綿絮南仲狷介亦不欲直受令君惠以錢百文  
索詩爲謝敬辭錢受詩而同僚卒以是誣之議者不  
獲將左遷曰是尚可以仕乎且母夫人年高無以爲  
養遂自解職歸上虞人請畱不得相與擁泣而去其  
居家也首創祠堂朔望奠祭一用朱子禮四坐母夫  
人于堂上菽水盡歡訓諸孫讀書以無墜先人之業  
暇日幅巾長裾逍遙泉石間或引觴賦詠世事一切

不以介意閣老陳公循尚書徐公琦孫公原貞通政  
畢公昌知府張公巖累復起之力辭不出天順己卯  
卒享年七十有五

吳寧

吳寧字永清歙縣人以春秋領永樂庚子鄉薦乙巳  
許安人逝懼弗得吉地襄大事哀傷不已夢有人指  
其處及遣術士視之果吉遂葬焉人以爲孝感所致  
宣德庚午中進士乙卯授行在兵部武庫司主事廉  
勤有爲聲稱籍甚正統戊午陝西京州守臣以回回  
迭力等類雜處內地非便奏送京師上命馳驛傳

送浙江沿海地方安插聽其貿易生理寧言此類貧者居多若止許貿易而資糧弗給窮恐語言不通水土不服未免失所有虧柔遠之仁 詔許可大者月給糧四斗小半之遂以爲例乙丑遷職方郎中丁卯持節冊封楚府餽送悉却不受歸未幾以瓦刺也先勢猖獗不可不預爲之備言於尚書鄺公埜以湖廣南畿征進麓川凱還官軍撥充攢運以江東河南江北直隸漕運官軍留京操練一旦有警易於調遣鄺是其言行之戊辰福建沙盜起命都督劉聚率師征勦 勅往南京會同守備豐城侯李彬等簡閱軍士

付聚統領比至清出私占之數居多人心稱快已  
虜寇犯順 英廟親帥六師討之已而土木失利寧  
慮逆賊必犯順奏留山東河南都指揮官員仍乞遣  
近臣分行口北地方防衛及護守京城八月陞本部  
右侍郎同于公謙盡心戎務九月賊入寇大同邊報  
甚急 景皇帝命于尚書謙總督諸軍禦之寧獨掌  
部事十月賊入紫荆關布列郊外 上命出都城與  
總兵議殺賊方略卽詣德勝門外營會議比歸門弗  
啟賊騎充斥從者各驚散城外居民潰入城者塞路  
寧立露雨中移時衣盡濕賊退方入是時畿內民庶

朝夕相率南奔弗可遏總戎欲頒詔天下勤王寧不可曰如此則人愈驚疑莫若具官軍勝賊本末移檄郡縣出榜撫安庶可弭變因具奏行之賊旣遠遁京畿奠安寧以勞傷成疾景泰元年疾大作不能事事遂陳情乞歸田里優詔許之旣歸疾漸平復杜門謝客足跡不至城府族姻故舊恩義兼至與鄉人處漠然無官貴勢自郡邑大夫至閭巷之人靡不敬而愛之卒之日遠近赴吊門不能容莫不哀悼痛嗟而去

楊寧

楊寧字彥謐歙縣人生穎異甫三歲祖父引至膝下

口授以詩卽應口成誦八歲能通大學語孟十一能屬文十八卽以春秋魁永樂丁酉京闈兩中乙榜不就宣德庚戌成進士尋詔歸進學壬子赴召明年授刑部主事獄明恕蔚有詩名正統己未麓川宣慰思任發反寇虜隣境朝廷命將征之簡文臣有才識者隨征寧其首也師次麓川境賊遣人欵軍門約降主將欲許之衆莫不喜悅乃獨進曰不可兵未加而敵降是必詐以誘我也許之懼有後悔弗聽固請不已衆謂其迂檄令督運金齒不旬月賊衆奄至士卒多陷北還京將兵者卒以失機被譴寧獨以勞

被褒賞特陞郎中歲辛酉大舉伐麓川總督軍務  
兵部尚書王驥知其料敵之審仍以寧行師入境王  
公指授諸將進取方略以寧督戰乃渡江攻上江賊  
砦賊矢石如雨寧奮不顧身督戰益力士卒咸用命  
遂克之又進攻杉木籠山賊柵險拒守寧曰賊狃於  
前勝當多方以誤之使不暇併力乃可圖王公用其  
言令諸將並進連破七寨餘賊奔潰遂乘勢擣賊巢  
圍之賊以死守晝夜攻戰不息因乘風舉火煙燄漲  
天賊不知所爲死鋒鏑及墮崖溺水不計其數師還  
英宗親宴勞於奉天門賜白金楮幣拜刑部右侍郎

壬戌丁母憂甲子奉命叅贊雲南軍務至則練兵伍  
督屯耕興利去害不爲勢撓先是有頭目恭項者嘗  
効力隨征具奏請置隴川宣撫司以恭項爲宣撫用  
旌其義民皆悅服有言騰衝險要宜城之以控制蠻  
夷者 上命往城或謂寧曰其地險惡多瘴非時冒  
之輒死盍徐圖之寧曰我知奉命而已遑卽其他卽  
往相地度工計財費勉勵將士使効力越四旬有五  
日畢工因建學舍選生徒訓令務學以變夷風自爲  
文刻石紀其事人敬服焉先是麓川賊首逃于緬至  
是以城完民且效順謀所以致賊計乃簡銳師若將

有所向者先遣奉祠責綑緬人懼哀求殺賊自效卒  
誅大憝函其首以獻自是朝廷無南顧之憂丙寅侍  
郎侯璡代還朝戊辰春 上以清明謁祭三陵俱命  
留守未幾閩浙東廣草寇竊發師征未寧命巡撫江  
西至則按視郡縣當賊衝者增修城垣立排柵以斷  
要路團集鄉兵訓以武藝有侵軼者輒擊斬之以故  
賊聞風畏避不敢犯於是益鎮以簡靜暇則遍歷諸  
郡宣上德達下情崇獎學校詢求民瘼而弛張之遠  
近畏慕景泰初還京奏對稱 旨有織金文綺羊酒  
之賜明日拜禮部尚書與毘陵胡濱協心政務濟寬

列光  
以嚴人謂得體後二年以病足艱於步履調南京刑部示優禮也其在刑部凡五六年斷獄一用寬恕民以不冤天順改元致仕家居踰年以疾卒壽五十有九有白雲稿臥雲稿藏於家

程思溫

程思溫婺源人正統己未進士授中書舍人進禮部員外郎以清慎著聞己巳扈駕北征死于土木之難景泰癸酉追贈光祿少卿錄一子太學

汪回顯

汪回顯祁門人正統間進士授戶部主事己巳北虜

犯邊督芻餉于畿甸奏行勸借賑恤之令人得甦息  
景泰初監運懷來永寧軍餉備嘗險阻明年買牛具  
于河南轉送大同給濟軍民耕種于時饑革塞路奏  
發廩賑恤全活甚衆又教民掘蕨爲粉以療饑民立  
祠祀之又嘗使西蜀覈實鹽井奏除冗課十餘萬後  
歷知廣惠二府政尚寬厚不任刑罰以老致仕歸

程 泰

程泰字用元休寧人登景泰甲戌進士觀政戶部乙  
亥奉命犒師宣府總帥厚餽悉郤之天順改元授戶  
部江西司主事己卯犒陝西復賜勅命督餉淮安一

年代還上書乞歸省從之癸未會試克同考試官未  
幾進員外郎督負徵於天津諸處成化改元晉郎中  
是歲用兵遼東遣泰給軍實師賴以濟庚寅遣視山  
東灾上書言四事曰存漕運以防民饑整兵備以衛  
民生減養馬以安民心增接遞以紓民力事多舉行  
比還擢廣西右叅政安南以地界不定數犯邊冒險  
往定之乃已理棼修墜政漸以成壬辰以母憂歸繼  
丁父艱喪葬一以禮拓先祠以謹時祀輯先德爲世  
芳集以傳服闋改河南右叅政奉璽書專理儲定轉  
輸遠近適均法以便民又以其暇時葺二程夫子祠

字以風其士人戊戌晉右布政使明年晉左布政使  
律已守法以倡僚屬一方晏然欲自引年章具未上  
而疾作矣聞者愕眙以爲善人之不幸距生年六十  
爲人恂恂謹恪口未嘗及人之過然其中涇渭極明  
有確然不可易者平居恬澹寡嗜好疑若不柰繁劇  
而居官不急不徐喜功邀譽者反出其下人陰被其  
惠澤甚多而世亦未盡知之爲學不事詞藻雖時賦  
詩以自適而藏其稿終不以自見也其不自伐如此

饒 欽

饒欽字克恭祁門人天順庚辰進士授戶部陝西司

主事有福建林舉人者以白金一緘寄欽而入會試死于火欽召其家僮還之家僮初不知也欽行素不欺由此名益顯嘗差監收通州等處糧儲平料量時出納軍民便之改南京戶部建議修造烏龍潭等處倉廩尋遷澂江府知府澂江古荒服地夷羅雜處欽至首興學校與民休息民俗不變所屬路南州土官無子欲以女襲職厚賂欽却不受卽日上奏以職官易之王恕巡撫雲南屬吏望風解印獨謂欽有古循吏體特剝薦之入覲民爲之攀轅泣留

汪進

汪進字希顏婺源人天順甲申進士授刑曹郎執法  
不阿治獄多所平反陞山西按察僉事後改湖廣政  
尤卓異初岳州平江民爲江西寧縣民所誣構數載  
不解几至生變巡撫以其事下三司叅讞進乃約期  
于界上結茅爲行署以會江西官卒伍從者千數進  
惟數人給役而已時逮繫者四百餘人進誓已秉公  
諭以國法兩造以判施州衛所轄夷官多爲中國人  
所冒誣訐群部夷甚苦之欲爲亂進追奪其印置之  
于法夷情遂安尋陞福建副使巡海時暹夷數千人  
乘大艦假以入貢迫境進察其奸率官軍聯舟鼓譟

以往夷遁去遷貴州按察司時都勻苗寇猖獗 朝  
廷命進討之師大捷陞陝西左布政使進以錢糧根  
本之地務持大體雖細務亦加之意民困獲甦遽以  
疾終進性峭直不畏權勢事親以孝聞撫孤侄曲盡  
恩意官居三十餘年家無餘貲人至今仰之

汪 淳

汪淳字原學績溪十一都人領天順己卯鄉薦授薊  
州知州州近輦轂當要衝且有三衛官兵雜處淳以  
誠篤廉謹蒞之南有龍池河壅塞爲患數疏募不通  
歲甲午河忽東注民患以息丁酉有蝗集于葛莊率

亭長禱之俄有黑蟲飛齧蝗滅禾亦大熟人謂德化  
所致秩滿百姓遮道赴 謞保留 上賜誥命陞從  
四品祿俾再任三年以慰民望立碑紀德尋陞廣西  
慶遠知府地僻邊隅猺獞雜處素號難治溥至撫御  
有方民夷安之二何以外艱歸軍民屢陳撫按交章  
奏保復知慶遠陞廣西按察副使整飭柳慶南寧等  
處兵備經略規畫悉體民情猺獞向化以卓異見旌  
卒于官民夷聞之皆流涕溥學行俱優所著有仕優

藁

潘 珏

潘珏字玉汝婺源人賦性醇篤自幼劬書十歲作詩有驚人語十有二歲從鄉先生張文輝受尚書歷五寒暑學成會戶當遠役而母病兄弟皆弱時府事閻經歷以御史左遷珏持詩文謁訴閻才之遭補邑庠生免其役天順甲申也初兄弟析產以水田若干畝佐讀書父沒終喪請於諸兄合爨作風樹圖以寄哀成化癸卯領鄉薦連登進士乙巳奉檄督賦南畿明年授湖廣蘄水令至縣閱倉粟得六百斛駭曰爲民父母而令水旱無備柰何爰下令諸贖刑及訟紙咸入粟縣治門中兩旁建倉貯之號阜民倉越二年大

旱盡發倉儲以賑貧乏簡下戶丁壯分隸上戶俾得  
傭作自給多種麥爲來年計復勸分助賑以濟不足  
是歲飢不爲害自是益廣儲蓄更建倉縣治之北號  
聚民倉前後積粟八萬餘石久益賴之縣之南門渡  
恃舟以濟水涸易以木梁歲費百金不免覆溺之患  
乃合二年費爲浮橋經久不病又以廟學湫隘闢而  
新之作興士類每爲講授成材甚衆邑故多盜令鄉  
民聚居列柵啟閉盜乃沮義官劉洪者實黠盜其子  
恥與同惡洪殺之事洩亟遣人分捕并獲其黨半數  
輒旣而司府將脫之具獄請對卒如初按初刲府致

弊于珏對使封貯官庫別以禮報之嘗使人諷欲婚其子珏不可旣又以所作畫來珏爲啟事辭謝久之王以罪廢珏無染焉治斬凡十二載秩滿當去賦別思詩士民遮道共立去思碑弘治戊午遷金華同知職專清戎尤慎勾稽未嘗徇權勢爲取舍有蘭谿民誣姪夜歐叔殺其妾縣官治姪死罪累年莫辯珏閱成案見其初驗屍時不云何衣悟曰此必就寢所計殺之也豈有婦人裸而敢鬪者耶詰之果服坐叔故殺罪而出其姪巡按陳君不悅曰獄屢經臺憲矣何若是子盾耶力爭之陳不能奪三載奏績便道省母

孺人于家遂有歸志還次嚴州投牒告繳部檄郡人  
士相率挽留而上官亦弗許尋就職乙丑 武宗卽  
位入賀陞福建僉憲奉勅督理屯田考簿書革奸弊  
豪猾侵尅之徒悉寘于法屯政漸復一日監斬夜歸  
病不能寢食歎曰戮人不當其罪而力不能救何以  
仕爲遂遣人上京乞骸骨時逆瑾擅權所知恐其得  
禍勸止之尋以鹽法忤中貴人中貴人陰主去戊辰  
吏部書以年老致仕瑾猶坐以他事罰米百五十石  
時六十有二得謝爲幸云歸十有五年足跡不出山  
惟赴鄉飲避寇兩至縣耳優游林泉文詠爲樂夜課

諸孫誦習不倦訂輯譜牒作勸善碑於道側睦族化鄉之意老而彌篤嘉靖改元覃恩進階中順大夫其年七月卒年七十有七初號雪竹入官曰澹翁人多稱澹翁先生云所著有甘棠集三觀稿晚遊錄澹翁稿雲萍唱和展驥集桃溪族譜凡若干卷

汪舜民

汪舜民字從仁婺源人成化戊戌進士授行人擢河南道監察御史巡按陝西甘肅等處多所舉刺從父奎以御史言事廷杖舜民扶掖之坐謫雲南蒙自經歷歷遷廣東東莞縣知縣擢江西按察司僉事詳讞

明允剖決如流擢雲南副使孟養餘孽思六叛據孟  
密承檄往撫定之以母憂歸服闋赴京會淮揚大侵  
議遣官賑濟之用薦改注山東理其事兼徐州兵備  
以便宜出納奏停不急之徵流民多復業擢福建按  
察使盜竊福清縣庫怨家有所詆指獄已成舜民廉  
得真盜而罪誣者脫三十人于死擢河南右布政轉  
左擢都察院右副都御史巡撫鄖陽居一月召還道  
改南京都察院正德二年卒舜民有才略平生矯矯  
以風節自勵至老猶不改其操云

胡富

胡富字永年績溪人成化戊戌進士仕至南京戶部尚書卒贈太子少保謚康惠富爲福建按察僉事時分巡至福寧州閱獄囚三百餘人有五六年不釋者審決不五日而囹圄一空爲山東僉事會朝廷封衡王於清州遣太監丘督造府第隨從之徒恃勢擾民有司患之廉得其索財罪狀并捕第丘棐置之法自是畏憚不敢肆役鉅而民不擾富之力也陞廣東副史適四會民徭作亂委富督兵勦之擒五百餘人又瀧水猺賊出沒不常其所經路側有荒田三千餘頃訪猺所畏者獐人而獐人素不爲盜乃於路口設

一獐圍移文廣西招致獐人住圍耕種自是猺人不敢出百姓亦倚獐人分種三分之一舊路復通海南黎人集衆數千寇儋州攻圍城池勢猖獗甚議跨海征之富與參議劉信往觀其營賊突至攻圍甚逼富奮力揮刀突賊圍而出手砍劇賊一人賊皆辟易無敢敵者還請益兵勦之地方始靖陞陝西布政關中文牒山積晝夜分處案牘立清會府有重獄訊決悉得其情冢宰三原王公聞而稱曰胡方伯真老法司也陞順天府尹時正德初羣閻用事逆瑾勢燄方熾遇事盡心行之不事表襍堂食分毫無取勢要畏其

廉白無私囑進大理卿轉南京戶部右侍郎富在大  
理時嘗會問勢家與民爭田土事逆瑾受賂示以意  
嚮富惟據冊決斷忤瑾遂令致仕瑾誅復原職未幾  
陞本部尚書南京倉糧惟會同館廩米最苦販納乃  
通計京糧每一千石撥二十石交會同館不至獨累  
一處甚便之先是京儲不及一年在部三年將有六  
年之積每語人曰南京根本重地倉廩何可空乏今  
幸充實而冗員蠹食之弊不除終非經久計也乃條  
革民患數事奏下關涉府廠多尼不行歎曰杞人有  
憂而志不克遂久戀祿位而不能去是誤國也乃引

年乞休疏六上始允富保全清節至死不渝嘗語諸  
子曰予居官四十餘年無他長但清白二字平生守  
之勿失爾曹他日有官守務全名節金帛易動人遠  
而弗親自然氣壯而事理宜無忘予言也

洪遠

洪遠字克毅歛縣人成化甲午舉鄉試講學于內翰  
謝公遷之門戊戌舉進士授莆田知縣前尹多苦勢  
家請託遠于廳事後置鼓客來坐未定擊鼓者三羣  
吏鴈行進立侍卽有請託者屏息不得出一語去莆  
地濱海海賊時發輒損戍兵巡海憲臣議僉民壯代

之力言不可暮年丁內艱既去而莆人思之甲辰改  
濬縣歲荒極力賑濟全活甚衆議者以濬大欲分隸  
湯陰濬人謹曰是使我離慈母去吾不忍也再踰年  
丁外艱弘治庚戌改交河縣其惠政如前尤加意學  
校公暇親爲諸生解講文義不倦部使者交章薦之  
甲寅徵授南京監察御史數言事不避權貴庚申陞  
浙江按察司僉事歷巡五道所至以鋤豪強撫孤弊  
佑良善爲先務壬戌兩浙飢分賑嘉湖放富鄭公青  
州朱文公浙東舊法叅酌行之二郡獨無流殍巡視  
憲臣疏其事有羊酒之賜甲子轉副使巡海道按察

使缺攝司事且一年諸道肅清先後巡按者列上其治行正德丁卯詔裁方岳剩員調湖廣時有兩制使在楚一督逋負操切嚴急遠下令勿亟民不忍累爭先輸足一專賑饑擇官分理獨委遠以全楚之半已巳晉廣西按察使廣西郡縣多土官簿書期會往往牽制或至十數年不結嚴爲之限辨治如中州無復敢後者庚午遷四川右布政使時盜賊充斥百務倥偬遠攝左轄慎出納裁冗費積羨萬餘緡悉以給軍餉辛未晉陝西左布政使尋擢右副都御史巡撫雲南獎廉吏出貪鄙遠徵以安十八寨夷舊常剽奪爲

邊患遠至皆出降或欲乘機擊之不可曰殺降不信置無辜于死地不仁掩其無備而襲之不武諸夷聞之益畏服部內有銀礦開則攘奪並起命銅之三載遂定鎮守中貴誅求害人數裁抑之屢欲中傷索之無可得乃已甲戌改南京大理寺多所平反乙亥轉南京右都御史諭諸言事者務存大體切時弊勿以詆訐爲事御史林有年諫取佛忤旨逮赴詔獄率臺官上疏救之己卯三載考績在道拜南京工部尚書徑趨闕下謝且辭優詔答之有清譽素著之褒還任越三日卽疏乞休致會有江西之變南京調兵備

禦凡器械悉取之工部時以疾作勉強視事勞瘁日甚遂至不起得年七十訃聞命禮部諭祭者再工部治葬域遠守官四十餘年勤慎如一日當逆瑾用事時驅馳遠方無所附麗疾革子侹問以家事不答但曰爾輩以忠孝立身足矣語畢正衣冠而逝朝食時猶對部屬處分公事相去僅七八刻耳其靜定不亂如此

程敏政

程敏政字克勤休寧人父信以河間學生舉進士官至南京兵部尚書謚襄毅十餘歲隨襄毅公叅政蜀

藩巡撫侍郎羅綺以神童薦之朝 英宗召試出題  
命對曰鵬翮高飛搏扶搖之九萬敏政云龍墀獨對  
陳禮樂之三千 上首肯之且喜其拜起如老成人  
命賜食詔館閣試之卽日賦 聖節及瑞雪詩并經  
義各一篇援筆立就文采粲然諸閣老翰長嗟異之  
暨進呈 上喜甚詔讀書翰林院官給廩餕時大學  
士南陽李賢安成彭時學士嘉興呂原中允壽光劉  
翔咸當世碩儒皆就之講授李公尤愛之因妻以女  
踰冠舉進士中成化丙戌科第一甲第二人授翰林  
院編修同修 英宗實錄己丑同考禮部貢舉時刊

布大明一統志洪武正韻資治通鑑綱目皆同校勘尋同修續資治通鑑綱目如石守信王審琦不預陳橋之謀韓通李筠李重進書死節開寶八年李煜降始罷分注書正統張世傑死之下始書宋亡之類皆出其手書成遷左春坊左諭德且以宋藝祖太宗授受大事也當時史臣不能詳記遂啟千古之疑乃取宋李燾宋史長編元史臣歐陽玄等宋史本紀以爲正而考訂發揮之餘點陳涇胡一桂之繆別著宋紀受終考三卷乙未春廷賜進士充受卷官俄詔侍講經筵尋兼皇太子侍講未幾丁襄毅公憂服闋

入朝丙午秋主考南京鄉試丁未 孝廟踐祚叙進  
宮臣遷詹事府少詹事兼翰林院侍讀學士克日講  
官時 茂陵工將訖詔議 憲宗皇帝升祔當定祧  
遷之制 孝穆皇后神主當有奉享之禮太傅英國  
公張懋等上議以 德祖比周之后稷 太祖成祖  
同周之文武俱百世不遷宜奉祧 懿祖一位別建  
祧廟奉藏歲暮則奉迎 祖主祫祭於 太祖之廟  
孝穆皇后比周之姜嫄及宋之章獻章懿二皇皆別  
廟奉享宜於奉先殿旁近宮室改別廟太保襄城侯  
李瑾等復上議以爲宜於奉先殿 憲宗神主几筵

之右別設幄殿以安 神主勅內官監於宮中相度  
吉地俟明年春營建別廟奏 上皆從之俱藁出其  
手弘治戊申同修 憲宗實錄尋詔敏政率其屬侍  
上將視學時禮儀簡略不稱詔議儀注敏政倡議預  
齋一日加帛一段樂設不作改分獻爲奠從之初開  
經筵詔侍講仍日侍文華殿講讀 上初卽位雅重  
講幄儒臣呼先生而不名嘗因講罷賜講官冠服敏  
政得金織緋袍一襲金帶冠履各一慰勞甚至徽州  
府儒學訓導周成進治安備覽詔看詳敏政摘其中  
多竊宋趙善璗自警編元張養浩牧民忠告或襲用

其標目或全剽其語言然此之猥不及彼之精況以治安爲名而不及君德心學謂秦商鞅有見於孔門立信之說則又踵王安石之故智其息異端等說亦非拔本塞源之論鄙俚而無雅馴之言迂妄而非經久之策詔以成狂妄置不問責還其書時詔議從祀孔子廟庭諸賢上疏曰臣聞古聖王之治天下皆以祀典爲重所以崇德報功而垂世教淑人心也故有功德於一時者一時祀之更代則已有功德於一方者一方祀之踰境則已先師孔子功德及於天下萬世其廟庭侑食之人豈可苟焉而已者若戴勝身陷

賊吏子爲賊徒劉向喜誦神仙方術謂黃金可成不  
驗下吏賈逵附會圖讖以致貴顯馬融爲梁冀草奏  
殺忠臣李固何休春秋解詰黜周王魯注風角等書  
班之孝經論語王弼與何晏倡爲清談取老莊之言  
以爲易注王肅女爲司馬昭妻佐昭篡魏杜預所注  
之左氏集傳其守襄陽則掊尅以饋遺洛中諸貴破  
吳則盡殺江陵譏巴之人爲吏不廉爲將不義凡此  
諸人其於名教得罪不小而議者謂能抱遺經轉相  
傳授不爲無功臣竊以爲不然夫守遺經者若左丘  
明公羊高穀梁赤之於春秋伏勝孔安國之於書毛

喪之於詩高堂生之於儀禮后倉之於禮記杜子春  
之於周禮可以當之若融等又不過訓詁此九人之  
所傳者爾請黜戴勝等八人褫爵罷祀而加后蒼封  
爵與左丘明一體從祀及考孔門弟子見家語者顏  
回而下七十六人家語出於孔氏當得其實而司馬  
遷史記多公伯寮秦冉顏何三人文翁成都廟璧畫  
多蘧瑗林放申棖三人邢昺論語注疏謂申棖在家  
語作申續史記作申黨重複無稽一至於此況察惲  
子路以沮孔子而孔子嘗稱瑗爲夫子決非及門之  
士放雖嘗問禮諸家皆不載之弟子之列秦冉顏何

疑於字畫譌誤臣請於帳黨位號宜存其一賚瑗冉  
何放宜罷其祀請進隋王通宋胡瑗加以封爵列之  
從祀且顏回曾參孔伋孔軻之傳道配享坐於堂上  
而回之父無繇參之父哲伋之父鯉皆坐食廡下恐  
諸賢於冥冥之中未必安於心也宋大中大夫永年  
伯程珦嘗不附王安石新法而二子顥頤實接道統  
之傳獻靖公朱松嘗不附秦檜和議而其子熹實集  
道學之大成今宜以杞國公顏無繇萊蕪侯曾哲泗  
水侯孔鯉邾國公孟孫氏及程珦朱松配享啟聖王  
叔梁紇俾學者知道學之傳有開必先明倫之義不

爲虛文矣先是臺臣論奏請進賢退姦且各有所指  
敏政之名在所進中由是素忌者有逐之之意矣俄  
御史魏璋以曖昧之言中之詔致仕有勸其自辯者  
敏政答書謂歐陽公朱文公當時各遭讒謗時歐公  
在執政故力可辯文公在庶寮故不可辯恐反遭鋟  
鍊故耳況上有老母下有弱子耶旣歸讀書休寧南  
山中若將終其身焉已復召還命敎庶吉士於翰林  
院尋遷太常寺卿仍兼翰林院侍讀學士掌院事兼  
修玉牒會有以楊時議從祀者上疏曰臣竊考程  
氏遺書朱子伊洛淵源程之造養深遠踐履純固無

疾言遽色及其學成而歸程子目送之曰吾道南矣一傳而得豫章羅氏再傳而得延平李氏以授朱子號爲正宗文定胡氏親承指授而春秋之傳作南軒上沂淵源而太極之義闡心學所漸悉本伊洛使天下之士曉然知虛寂之非道訓詁之非學詞章之非義則龜山傳道之功不可誣矣當崇寧之世蔡京柄國躋王安石於配享位次孟子而頌其新經以取士尊安石爲聖人不復知有孔子誦新經爲聖言不復知有古訓僭聖叛經凡數十年龜山入朝首請黜其配享廢其新經又請罷綱運以收人心斥和議以張

國勢竄權臣以正邦憲培主德以崇治本則其衛道之功亦不可掩朱子謂龜山之出惟胡安定之言最公當時若能聽用決須救得一半且若朱若張皆淵源于龜山者咸在侑食之例獨其師有傳道衛聖之功反不預焉揆之人心誠爲闕典今以龜山躋於從祀列東廡司馬光之下胡安國之上宜矣其應封伯爵行移翰林院定擬仍行國子監及天下學校一體從祀從之尋丁內艱十一年服闋入朝未至轉詹事府詹事兼翰林院學士陞見後遷禮部右侍郎兼學士會典副總裁仍掌詹事府事侍東宮講讀已未

春主考會試未揭榜給事中華景劾其鬻題賣士下  
詔獄敏政疏請致仕且引咎自責乞釋景以全諫臣  
既而獄上亦以諫官一時風聞無迹可指而同列林  
廷玉再疏劾之敏政曰有識者皆知景爲妄吾所以  
不深辨者顧存大體爾今言之不置是豈得已乃請  
與廷辯廷玉景語塞坐罪敏政致仕未行卒年五十  
五贈禮部尚書敏政秀眉長顱風神清茂於書無所  
不讀文章爲一代宗匠天稟既高而又上沂伊洛淵  
源深探而精擇嘗考合朱陸二家始之所以異而終  
之所以同名曰道一編其造詣槩可見矣侍經筵久

每進講篇終必有規諫諷切深至 上每欣然聽納  
喜接士大夫不以貴自倨不以才自負升其堂者屢  
談不厭叩之者不能測其涯涘雖遭多言至於逮繫  
言動如平日未嘗有幾微不平所著有篁墩稿續稿  
三稿新稿共百二十卷行素一卷編類皇明文衡一  
百卷蘇氏檮杌若干卷道一編六卷瀛賢奏對錄若  
千卷新安文獻志一百卷宋逸民錄十五卷修定程  
氏統宗譜四十卷陪郭支補三卷程氏貽範集四十  
卷附注真文忠公心經三卷大學有重定本子壠以  
襄毅公功官錦衣衛千戶

汪 奎

汪奎字文燦婺源人成化丙戌進士授秀水縣知縣  
擢監察御史丙午以災異上疏言及宮闈忤旨被撻  
謫夔州府通判弘治初陞叙州府同知成都府知府  
歷陝西右叅政廣東按察使廣西左布政使辛酉陞  
右副都御史巡撫貴州有平苗功未一年言官劾奎  
老疾遂致仕以壬辰卒賜祭葬如例奎性簡靜尚氣  
節不妄取與居官以篤實從事恥務奔競雖無時譽  
其自守有足稱者

方 瓊

方瓘字時素婺源人生有異質既長厭科舉學慨然  
有向道之志聞湛元明講學南都往從之湛與語奇  
甚授以宗旨令爲國子諸生向導瓘潛心晝夜不避  
寒暑湛喜曰吾道不孤矣及湛北上瓘不憚險阻徒步  
遠從之歸以所學策勉同志親喪哀毀逾禮有再  
從兄弟異居旣久貧不能存瓘慨然曰昆從莫非一  
體柰何使失所乎與之合爨遠來從學有不給者輒  
贍之坐是屢致窘乏無怨悔湛歸廣城瓘遠造請返  
而同行友王子墩罹瘴死舟中例不載屍乃秘不發  
同屍寢數日至韶始發之時韶守爲瓘故人遂得賻

斂舉歸尋復與洪垣卒業東廣湛建二妙樓居之曰  
吾道之託在是矣督學胡植按郡聘入試不舉遂絕  
意仕進卒年四十五平生無意著作其正學存稿乃  
門人所錄緒餘督學舉入鄉賢祠表之曰正學云

謝復

謝復字一陽祁門人自幼聰敏性復純篤父常攜之  
遊文廟問曰儼然而肖像者非聖賢歟夫非盡人之  
子歟翁奇之稍長授春秋於于翰林竹坡先生卽了  
人義已歎曰學以謀道滯心文義以干祿吾弗爲也  
於是潛心經史以古人自期聞康齋吳先生講道小

彼遂棄舉子業不遠千里往從之凡有得於講授者必心體力行以求自得三閱寒暑弗少懈康齋喜曰吾道有望矣旣歸益修躬行日率其弟嘉侍親側饌具必躬治坐立不敢南面退與其妻葉氏相敬如賓與弟嘉敦友愛親歿不御酒肉蓋孝友之性發自天至垂老如一復率族人卽城南建祠祀始祖唐金吾公以下冠婚喪祭悉遵古禮爲鄉人倡平居寡言笑接人和易有問應答如懸河然嘗聚徒南塘每開廸以孝弟爲先窮年一室討古論今遇感有作之危然發其養弘治中與修邑志太守幸菴彭公深敬禮之

造詣既久遠近知名葉畏齋問學曰知行並進否則落記誦訓詁格矣令鄭公問政曰辨義利則知所以愛民厲已時以爲名言世居庠西晚徙築西山之麓學者稱爲西山先生其曰南塘漁隱曰廢翁曰無慮子皆其自號以弘治己丑卒得年六十有五所著有西山類稿

謝顯

謝顯字惟仁祁門人生而沉慧異凡兒稍長苦志問學家貧甚或勸之治生顯應之曰治生孰若治心志益勵弱冠卓爲人師嚴毅方正不徇時好聞人有謔

浪語輒不憚鄉里敬憚之博綜經史尤邃于易嘗自誦曰欲作天下屠龍手肯讀人間非聖書湛元明講學南都顯往質焉屢問而屢不答顯茫然自失覺其始之所學猶外也退乃于靜坐中求之久而有得元明器之歸構神交館與謝莘及六邑之士方瓘等日相究竟莘學力行真確而元明屬望顯與莘益篤顯曰人一念差一言差則天地萬物爲之解體又曰精神須醞釀得到又曰此學如過獨木橋相似絕無幫貼倚靠有立脚處皆格言也所養于是爲至年四十九卒所著有 聖諭演易說并文集諸書督學耿定

向廉之從祀鄉賢祠評之曰跡其所至已在善信之間克其所志不底于聖人不已也

吳 鸞

吳鷗歙巖鎮人與兄鼎弟珊客黃州衆夜鬪殺人誣鼎吏捕之急鼎不知所出鷗曰兄年高未有子弱弟老母所憐皆不可死獨鷗子已長願代兄以塞禍遂詣吏就繫鼎冤之求直不已鷗謂曰空自苦必無生望不若保餘貲善事老母撫弟姪立門戶母以弟爲念也其夜具衣冠自經死州人傷之白于府卽獄中棺轉出以禮殯之時陳司徒金劉司寇天和義其事

以詩文吊之正德中郡守張公書取義字表其門鑄其名于里之節孝坊

胡德

胡德字之婺源人登正德戊辰進士授南戶部主

督輸閩浙時有巨璫搜其篋止扇數握後以四川

叅議歸養 詔訪司道可大用者吏部奏起之累陞

至雲南叅政大理土官侵竈戶鹽利垂九載部使者

請兵德至獨單車深入召父老諭之曰激之者罪也

荷戈豈良民乎父老叩頭願死德爲正土官罪逋課

數萬悉處分補之撫按論功固辭數月乞歸養家居

三十餘年謝跡城市有迂樵雜著等稿

戴祥

戴祥字應和績溪人登正德辛未進士父驥知棠邑爲清白吏祥謁選適選曹爲棠邑人或言見之可得美秩祥謝勿往授行人奉使藩府贈遺一無所受陞南工部員外掌蘆課以廉稱轉戶禮正郎歟歷三部清慎一節陞雲南尋甸知府引疾致仕歸冲淡夷曠日與泉石友唱和足跡不履公府約已力學田宅不增尺寸奉二親撫庶弟以孝友稱邃于經學門下士多通顯有聲子嘉猷中丙戌進士知烏程有惠政拜

給事中上謁 與獻帝園陵疏諫詔杖 闕下謫廣

西尉後起官至浙江海道副使

葉 琦

葉琦字廷珪祁門人生有異質日記萬言稱神童年十一補邑諸生十八發解南畿甲戌成進士觀政工曹卽焚香自矢以立身行道爲先忠君愛國爲念以范文正陸宣公自期待忽聞父疾篤卽上疏乞歸虔禱願以身代藥必躬調衣不解帶凡七日夜忽有異人授摩運法疾脫然愈衆謂孝感所致當道強之仕竟以親老終養力辭不赴創宗祠置義田義塾坐是

家窘恬然自安鄉人重之相稱必曰葉先生云

趙時勉

趙時勉字誠之歙人幼孤貧事母及贍寡嫂以孝友聞舉正德八年鄉試詣闈上時政二十事多所條切選授武城縣歲饑民流大施寬卹之復具疏請賜蠲拯得除民租之半節厨傳費歲積數千緡民賴以復業卒于官武城誌止名宦五人時勉尤見稱配祀于其邑陳太守祠著有存笥詹言及奏疏稿于家

黃鏗

黃鏗字德鳴歙人家貧力學正德己卯與計偕令蘭

溪有聲擢廣東道御史武定侯勛怙寵驕恣鐘目攝  
勛欲糾之未發而語已傳爲勛所啣會奉勅行邊  
時邊將僨事者罰金例多括之士卒鐘廉其弊議以  
輕重行黜責發黷將私覲之罪諸將懼流言御史嚴  
將不爲開府地撫臣因先發御史不禁送迎使信地  
空壁下御史大夫議議上行邊勅印在焉體得護  
行而侯勛從中彈之竟謫浙按察知事稍遷九江判  
既守濱州貳撫州府所至能盡職在浙幕攝諸暨有  
渺湖沒于豪右吏莫敢問鐘至復爲官湖利賴數邑  
居州歲祲饉請捐逋減額躬行阡陌勞來流徙戶口

盡復濱人戶而祝之勛敗進南京刑部四川司郎中  
部獄多所爭于司冠歸里疾卒子應坤官至大理丞  
以克世著

游震得

游震得字汝潛婺源人家故壁立父泰亨博學力行  
蚤歿母汪課之備艱苦戊戌成進士選行人後擢給  
事南禮科侃侃言天下事議東宮禮請講學疏尤切  
直丁艱補戶科尋轉兵科左給事出備兵南贛值大  
水壞民廬舍多方賑拯賴以全活叅政湖廣治辰州  
採木採金採砂之令雜下一切調劑夷裔無擾陞本

省廉憲轉福建右藩使旋晉右僉都御史巡撫福建  
倭患充斥疏請將軍戚繼光將浙兵戍守積寇漸平  
無何戚解戍去留之不得黠倭遂掩入殘興化引咎  
代還倭亦旋掃滅人推其綱繆功不可滅 穆廟求  
巖穴召起僉都御史總督南京糧儲已而言者猶以  
前事侵及遂歸里所司交薦不復起生平敦尚風節  
避權門若熟家庭篤于孝友捐貲置義田倡文會以  
成就宗黨之貧者族子弟咸藉興起宗姚江良知之  
學著談秕要錄周易會通諸編多所發明所居瀕溪  
噙於水乃割其半以受噙曰吾能讓則不患噙矣以

嗜餘構屋數楹郡守鄧文溪爲題讓溪書屋學者因稱讓溪先生

鄭 燭

鄭燭字景明號遠齋歙人少嗜學補郡博士弟子從學湛甘泉鄒東廓之門歸而講業郡邑及門者數百人持論一稟中庸或有摭先哲遺行發人隱者問輒不答強質之則徐曰論何及此第師其善者足矣前後學使者衡文行並首舉燭貢入成均四方講德之士多依之敝衣糲食潛心遺經有見其衣冠質朴羨其率真者燭曰率真未易言先須識真耳選河間

府判主密雲餉至則嚴出納謝一切羨間伍使之顧不求合當事中忌改辰州府守官如故暇則進諸生講學咨決所疑以身爲師未幾以前忌復移官奔父喪歸時年六十餘哀泣羸憊至不勝喪踰年卒著有石田稿子孫多世其學

### 王獻畫

王獻畫字德忠歙人員外郎寵之子虞衡郎中獻芝弟家世科第獻芝任御史著風裁歷官廉正獻畫天性孝友人無間言杜門自守以成父兄之德族有千金之產乏嗣以繼議及者引義不就自少志聖賢學

動循矩矱博覽墳典尤嚴心於三傳著爲論說於多所發明居常下帷授徒聞呂涇野講學留都往師之其學以躬行爲先以經世匡時爲已任未及施而卒

許象先

許象先歙縣諸生也立志以聖賢爲必可學篤脩實行不尚浮華父歿于淮奔喪歸葬三年不入內室徽二守同門友也禮待甚優皇木商以百金求爲寬限嚴拒不納族兄弟相訟賄以求理拒絕尤峻率族人爲家會居恒講明聖學務祈折衷歸于至當而後已

母病旦夕侍側藥餌必親嘗而後進母歿憊痛廻甚  
半月卒于喪次有司申請祀于賢祠

程弘忠

布衣程弘忠字汝一別號天津歙人父業賈貧不能  
資之學性敏嗜文義間發爲詩士人覽之曰是深于  
學者也年二十九師王心齋于泰州遂專意問學三  
年欣然有得因涉歷四方徧從鄒東廓王龍溪羅近  
溪耿楚侗考業一時賢碩咸嘉樂焉後遊衡岳曾植  
齋延之書院數年所至啓發人無賢愚必有興起萬  
曆癸酉自衡之粵謁陳白沙湛甘泉墓還疾作卒于

廣城書院其學宗心齋而自經參悟不爲依傍學者  
樂就之衡陽人士繪像祀石鼓書院曾植齋侍郎尤  
信服之至祀于家云所著有雅音集